


“শ্রী শ্রী রাধামাধব জীউ মন্দির উৎপত্তি বারো
উন্নতির সিঁজিল”
(১ম খণ্ড)



শ্রী ব্রজগোপাল সিংহ



শ্রীশ্রী রাধামাধব জীউ মন্দিরর উৎপত্তি বারো উন্নতির সিঁজিল

(১ম খণ্ড)



শ্রী ব্রজগোপাল সিংহ

SRI SRI RADHAMADHAB JIU MANDIRAR UTPATTI BARO UNNATIR SIJIL, a collection, Socio-cultural spiritual, historical sources, datas etc., is written by Sri Braja Gopal Sinha, MA BT, LLB Sastri and Published on 9th March, 2007 on the occasion of 127th **SRI SRI RADHAMADHAB KENDRIYA ADHIBESHAN**, Sebapuja Samittee, Chamtilla, Dullabcherra.

১লা সংস্করণ :

ফণ্ডনির খেলতাম :

১১ই মার্চ, ২০০৭

ফংকরানিং : শ্রী বনমালী সিংহ, IAS

কমিশনার (শিক্ষা বিভাগ, ত্রিপুরা)

(সৌজন্যে বারো প্রকাশনায়)

শ্রীশ্রী রাধামাধব জীউ সেবা পূজা সমিতি

সিংলা আঞ্চলিক কমিটি।

মুদ্রণে :

মডার্ন প্রিন্টার্স

মেইন রোড, করিমগঞ্জ

আসাম, ফোন : ২৬১৫০০

মূল্য - ২৫.০০ (পঁচিশ টাকা মাত্র)

উৎসর্গ

“দ্যৌর খয়া পাছি রাধামাধব জীউ সেবা-পূজার
কামাদার বা সেবাইত বারো কর্মকতার নিঙে”

শ্রদ্ধাঞ্জলি

বৈষ্ণবদাসানুদাস ব্রজগোপাল



ADHIBESHAH,  Samsat, Chaudhary

ਜਿਸਤ

ରାଜ୍ୟ-ରାଜ୍ୟ ଓଡ଼ିଶା ରାଜ୍ୟର ଶ୍ରୀମତୀ ରାଜ୍ୟ

"ଶ୍ରୀମଦ୍ ରାଜକୋଟେ ଯ୍ୟାତ ତର୍ହିତାରା ଚି ଗୁଣାଲୋକ

ବିଜ୍ଞାନ

ॐ नमो भगवते वासुदेवाय



“লেখকর দ্বি আকচুটি”

রাধাকুণ্ড ধামর শ্রীশ্রী রাধামাধব জীউ মন্দিরগোর উৎপত্তি বারো থাংনাত প্রভুর সেবা-পূজা করানির উন্নতির সিঁজিল কিসাদে কিহান আছে, এহানর ধারাবাহিক বৃত্তান্ত খানি লেংকরতেগা নিয়াম তথ্য যোগাড় করানি নুবারেছু। খমকরা তথ্য যেতা পুলকরেছু, ওতা লেংকরিয়া লমকরানির খামতলে উল্লেখ করেছু। তথ্য সংগ্রহর ভিতরেদে শ্রী শ্রী রাধামাধব জীউ সেবাপূজা পরিচালন সমিতির প্রাক্তন অন্যতম কর্মকর্তা মুখ্য উপদেষ্টা আচার্য উদয় চন্দ্র সিংহ গিরকর লেংকরা শ্রীমন্দিরর ইতিবৃত্ত বারো সিংলা আঞ্চলিক সেবা পূজা সমিতির সভাপতি শ্রীযুক্ত সেনাতাম্ফা সিংহ গিরকর করপেক বা পুলকরা নথিপত্র পাকরিয়া খানি আহান চিন্তার পরিবর্তন অইল নিঙে গিরকগাছিরে মোর আন্তরিক কৃতজ্ঞতা জানাউরি। আরাক উল্লেখযোগ্য দিক আহান অইলতায়-১৯৮৪ ইংরেজীর অক্টোবর মাহাত মোর জন্ম ধাত্রী ইমা হেমলতা দেবীরেলো বৃন্দাবনধাম তীর্থ পরিক্রমাত গিয়া রাধাকুণ্ডধামর শ্রীশ্রী রাধামাধব প্রভুর মন্দিরে ৭ দিন আছিলুগা। ওপেইত শ্রীমন্দিরর পরিবেশ অমাটিক উন্নতি অছিল বুলিয়া নিঙ নাছিল। ও সময়কার সেবাইত বা কামাদার শ্রদ্ধেয় মদন বাবা সিংহ (নরসিংপুর) গিরকর লগে অনেক আলোচনা অইল; খানি আহান হারপেইলু যে রীতিমত চাঁদা ধামে না দিয়া পেঠেইতার।

যাই হোক, উতার বহু পরে সেবা-পূজা কর্ম-কর্তা গিরিগিথানীর হংনায় আগেকার উতান্ত আরাক খানি আহান উন্নতি অইল। ওবাকাও পুরি মোরতা মনে মনে শ্রীশ্রী রাধামাধবজীউ মন্দিরগোর উৎপত্তি বারো উন্নতির সিঁজিল কিসাদে আগ বাড়েছে, উহানর য্যারী কিতা লেরিক শৌ-আহানর আকারে ইকরানির ইচ্ছা-জাগেছিল; যদিযৌ বিভিন্ন অসুবিধার ভিতরেদে লেরিকশৌ এহান লেংকরিয়া ফংকরতে খানি ডিলঅইল, ওহানরকা দুঃখিত।

আরাকৌ উল্লেখযোগ্য য্যারী আহান অইলতায় — ২০০৩ ইংরেজীত

আগরতলারমা উত্তর পূর্বাঞ্চলর ঐতিহাসিক সম্মেলনে আজীবন সদস্যগো হিসাবে ৩ দিনকার অধিবেশনে যোগদান করেছিলুগা। ঐ সম্মেলনে আমার জাতর লকেই বা গোষ্ঠী বিভাগ, গোত্র ইত্যাদি সম্পর্কে ইংরেজীলো প্রবন্ধ আহান ইকরিয়া উপস্থাপন করেছিলু, যেহান ঐ “নেহা” (NEIHA) বুলতারা ঐতিহাসিক সংস্থা উহানে স্বীকৃতি দেছিল। ঐ সময় মোর বিশ্ববিদ্যালয় সহপাটি বন্ধু আগরতলার I.A.S. কমিশনার শ্রী বনমালী সিংহ গিরকর বাংলাগোত তিনদিন আছিলু গিরকে শ্রীশ্রী রাধা মাধবজীউ মন্দির সম্পর্কে মোর লগে অনেক আলোচনা করল। এমন কি গিরকে মাতল যে আমি হাবিহান থাইতে ধামর প্রভুর মন্দিরগো সম্পর্কে পাংলাক করিয়া খানি আহান আগ না বাড়েইলে জাতর পরিচয় বা অস্তিত্ব টিকিয়া থানা চিলছে। প্রভুর মন্দিরগো সমাজর একমাত্র ধর্মীয় প্রতিষ্ঠান হান; এহান উন্নতির সিজিল করিয়া ঙালকরানি থক। ঔহানাত মি কুপকরে খালকরিয়া চুমছে বুললু। ঔবাকায় মোর চিন্তা ধারা আরাকৌ আগ বাড়িল যে শ্রী শ্রী রাধা মাধব প্রভুর মন্দিরর বৃত্তান্ত বারো উন্নতি সম্পর্কে লেরিক শৌ আহান নিকালানি। তা থকয়া শ্রী রাধা মাধব মন্দির প্রতিষ্ঠাতা ব্রহ্মর্ষি পুণ্ডরীকান্ধ শর্মা এইগা গিরকরাংতো চিনকরে থাংনায় থাংনায় যেতা সেবাইত বারো কর্মকর্তা দ্যৌর খয়া পেইলাগা, ঔতার রাতুল চরণে ভক্তি হমা কাতকরিয়া শ্রীশ্রী রাধা মাধবজীউ প্রভুর মন্দিরর ইতিহাস বারো উন্নতির সিজিল বুলিয়া লেরিক শৌ এহান বামুন ক্ষেত্রী বৈষেব দশগিরিগিখানী ভক্তর মুণ্ডে প্রথম খণ্ড হিসাবে ১২৭ তম সাধারণ অধিবেশনে ফংকরানি অইল। কারণ শ্রী মন্দিরর উন্নতি ক্রমান্বয়ে বাড়লে ভক্তমানাইর কৃপালো আরাকৌ থাংনাত প্রকাশ করানি অইতয়। তা থকয়া ১ম খণ্ড বুলিয়া ফণ্ডর লেরিক এহান পাকরতে কোন লাল চুম বা কিতি কুরুম অইলে লেখকরে দয়া করিয়া ইকরিয়া জানেয়া পথ চুমকরে দেনারকা ভক্তমানাই, পাঠক - পাঠিকারাং সাচারাং ভক্তি হমা কাতকরিয়া লমকরুরি। ইতি —

দোল পূর্ণিমা তিথি

১৪১৩বাংলা

বৈষেব দাসানুদাস ব্রজগোপাল ।

শুভেচ্ছাবার্তা

শ্রী ধাম রাধা কুণ্ডস্থ

শ্রীশ্রী রাধামাধব প্রভুর সেবা-পূজার সুযোগ কি সাদে অয়া আমার এ নিখিল বিষুগ্ৰিয়া মণিপূরী বৈষ্ণব সমাজে পেয়া পূন্যার্জন করে পারেজিয়ারগা, এহানর ঐতিহাসিক সঠিক তথ্যাদি ডাঙরীয়া শ্রীযুক্ত ব্রজগোপাল সিংহ গিরকে সংগ্রহ করিয়া ধারাবাহিক ভাবে লেংকরেছে। এহান অকরাও খামতল পেয়া মনহান দিয়া পাকরিয়া পুন্নিংয়ৌপা হারউপা থাকাং জানেয়া মত ফঙ করুরী যে, মি এ অধমর অনেক জানা-অজানা তথ্য হারপেয়া গিরকরে অশেষ ধন্যবাদ বারো কৃতজ্ঞতা জানেয়া, স্বয়ং প্রভুর শ্রীচরণে গিরকর মঙ্গল প্রার্থনা করুরী।

গিরকর এ হনার কারণে মোর জীবনর ডাঙর খৌরাঙ আহান আছিল ওহান মিটাদিলো। ঠিক এসাদে সমাজর হাবিরতাউ নিশ্চয়ই মিটতই বুলিয়া নিঙকরুরী। লমক হরে কৃষ্ণ—

তারিখ

২৭/৮/২০০৬ইং

পাঁচডালী, শিংলা

হেহঁচাত

শ্রী সেনাতান্মফা সিংহ

সভাপতি

শ্রীশ্রী রাধামাধব জীউ সেবা পূজা

শিংলা আঞ্চলিক সমিতি



B. Sinha, IAS

COMMISSIONER & SECRETARY

Education (School) Department

GOVERNMENT OF TRIPURA

Agartala - 799001

Ph : 2324127 (O), 2353737 (R)

Fax : 03812324127

E-mail : Sinhabanamail@yahoo.com.



শুভেচ্ছাবার্তা

দুর্লভছড়া উচ্চতর মাধ্যমিক বিদ্যালয়ের মাননীয় অধ্যক্ষ শ্রীযুক্ত ব্রজ গোপাল সিংহ গিরকর লেংকরা “শ্রী শ্রী রাধা-মাধব জীউ মন্দিরর উৎপত্তি বারো উন্নতির সিঁজিল” লেরিক এহানে বিষ্ণুপ্রিয়া মণিপুরী সমাজর গিরিগিথানী, প্রভুর মানায়, বামুন-ক্ষেত্রী, বৈষ্ণব-হাবিরে নুয়া চিন্তাধারার পথ আগো ইলকরে দিতয় বুলিয়া সি নিংকরুরি। সমাজর একমাত্র ধর্মীয় সংস্থা “রাধামাধব জীউ সেবা পূজা পরিচালনা সমিতির” লগে যুক্ত গিরিগিথানীরেউ গিরকর লেংকরা লেরিক এহানে নুয়া চিন্তা ধারার খোরাক দেনাত পাংলাক করতয় বুলিয়া নিংকরুরি। লেরিক এহান ঐতিহাসিক তথ্য পূর্ণ বারো জাতীয় ইতিহাসর পথগদে কাকেই কারানির নিদর্শন দেয়।

যেতাউ-অক, শ্রদ্ধেয় অধ্যক্ষ গিরকর লেংকরা লেরিক এহান নুয়া উঠিয়া আইতার। প্রজন্মরেউ পাংকাল দেক নিঙে সমাজর হাবি থাকর গিরিগিথানী, ইমা-ইন্দল, বুজন কনাক, ভক্ত - মানায় গিরিগিথানীর প্রতি মোর ভক্তি শ্রদ্ধা জানেয়া লেরিক হানর শ্রীবৃদ্ধি অক ভাব এহানলো এপেইত লমকরুরি।

জয় শ্রীশ্রী রাধামাধব জীউ কী জয়।

ইতি—

বনমালী সিংহ—

(বনমালী সিংহ)



—ঃ সূচীপত্র বা কোন পাতাত কিহান আছে :—

ক্রমিক নং	বিষয়	পাতা নং
(১)	শ্রীশ্রী রাধামাধব জীউ মন্দিরগোর ঐতিহাসিক সূচনা	১
(২)	শ্রী রাধামাধব জীউ মন্দিরে ব্রহ্মর্ষি পুত্তরীকান্ধ শর্মার ভূমিকা	২
(৩)	প্রতিষ্ঠাতা সেবাইত পুত্তরীকান্ধ শর্মার উত্তরাধিকারীর কার্যকলাপ	৫
(৪)	শ্রীশ্রী রাধামাধব জীউ সেবাপূজা সমিতি হংকরানি বারো থাংনাকার পদক্ষেপ	৯
(৫)	শ্রীশ্রী রাধামাধব জীউ স্বাধীন সংস্থা হিসাবে রেজিষ্ট্রেশন বারো উন্নতির সিঁজিল	১২
(৬)	শ্রীশ্রী রাধামাধব জীউ মন্দিরর সেবাইত বা কামাদারর ধারাবাহিক নাং বারো ঠিকানা	১৩
(৭)	শ্রীশ্রী রাধামাধব জীউ সেবা পূজা সমিতির সভাপতি বারো সম্পাদকর ধারাবাহিক নাংবারো ঠিকানা	১৫
(৮)	শ্রীশ্রী রাধামাধব জীউ মন্দিরর ২০০০ সনর থাংনাকার উন্নতিমূলক কামকাজ	১৬
(৯)	উপসংহার বা খামতলহান	১৯



“শ্রীশ্রী রাধা মাধব জীউ মন্দিরর উৎপত্তি বারো উন্নতির সিঁজিল”

(১) ঐতিহাসিক সূচনা :- বঙ্গদেশে এয়োদশ শতিকাৰ পয়লাবেদে সেন বংশৰ ৰাজা লক্ষণ সেনৰ হাকতাকে তুৰ্কী সেনাপতি মহম্মদ ইকতিয়াৰ উদ্দিন বিন বখতিয়াৰ গিরকে গৌড় ৰাজধানী নদীয়া জিলা আক্ৰমণ বারো দখল কৰানিৰ সময়ত ঔ সময়কাৰ সভাসদ কবি জয়দেব গোস্বামী গিরক কৃষ্ণপ্ৰভুভক্ত শ্ৰেষ্ঠ বৈষ্ণৱ কবি আগো আছিল। ঔ কবি জয়দেব গোস্বামী গিরক শ্রীশ্রী জগন্নাথ মহাপ্ৰভুৰ কৃপায় শ্রীশ্রী গোবিন্দজীউৰ সাক্ষাৎ দৰশন পাছিল বুলিয়া প্ৰভুসেভাৰ একনিষ্ঠ সেৱাৰীগো আছিল। ঔ কবি গিরক তুৰ্কী সেনাপতি তথা অন্যান্য মুসলমানৰ অত্যাচাৰে হিন্দুধৰ্মৰ গ্লানি বারো প্ৰভুৰ সেৱাপূজাৰ কাম-কাজে শ্বৈৰ্ণেই বাধা অইতয়হান হাৰপেয়া গোবিন্দ জীউ প্ৰভুৰ মূৰ্ত্তিগো লেমপালহানাৎ দিয়া সহধৰ্মীনি সতী পদ্মাবতীৰেলো বৃন্দবনধামে যাত্ৰা কৰল। প্ৰসঙ্গতঃ উল্লেখ কৰানি থক যে তুৰ্কী সেনাপতি কবি জয়দেব গোস্বামী গিরকৰে বন্দী কৰিয়া আনানিৰ য্যাথাং দেনায় স্বয়ং গোবিন্দজীউৰ বিগ্ৰহগো স্বপ্ন দৰ্শনে পেয়া গোস্বামী গিরক ধৰ্মৰক্ষার্থে ৰাধাজীউ ধামে যাত্ৰা কৰল। ধামে আয়া লগে লগে প্ৰভু জয়দেব গোস্বামী গিরক তাৰ পৰিষদ বৰ্গ হাবিৰেলো ধামৰ পৰিক্ৰমা লমকৰিয়া ৰাধাকুঞ্জ বারো শ্যামকুঞ্জ শ্ৰীধামে আয়া ফউঅইলগা, যেহান ৰাধা-কৃষ্ণৰ নিত্য বিলাস ভূমিৰ ফামহান। ঔ ফামউহানাৎ বিছাৰেয়া শ্যামকুণ্ড বারো বিশাখাকুণ্ডগোৰ হাদিগৎ যে ফামহান আছিল, ঔহান কাঁটাৰন সেংকৰিয়া উপযুক্ত মন্দিৰগো হংকৰিয়া গোবিন্দপ্ৰভুৰ সেৱা পূজা কৰানি অকৰল।

প্ৰভু জয়দেব গোস্বামী গিরকৰ শ্রীশ্রী ৰাধামাধব জীউ প্ৰভুৰ সেৱাপূজা বারো ভাব ভক্তিৰ একনিষ্ঠাতাহান দেহিয়া অনেক সাধু সন্ন্যাসী বারো ব্ৰজবাসী ঔ কামে শিষ্য হিসাবে দীক্ষিত অইলা। এসাদে কৰে প্ৰভুৰ সেৱা পূজাৰ ফামহান ঙালনি অকৰল। এসাদে কৰে অনেক দিন লালয়া যানার থাংনাত জয়দেব গোস্বামী গিরকৰ সহধৰ্মীনি সতী পদ্মাবতী গিথানক চিৰ বিদায় নিয়া অমৰ ধামে গেলীগা। ঔতাৰ কতমাহাৰ থাংনাত জয়দেব গোস্বামী গিরকৰ স্বাস্থ্যগো অন্তিম দশাত ফউঅনিৰ লগে লগে তাৰ উপযুক্ত শিষ্য আগোৰাং সেৱাপূজাৰ ভাৰহান সমঝাদিয়া ইমা

গঙ্গার আবির্ভূত অজয় ঘাটে পৌষ সংক্রান্তির দিনে ব্রজধামেও চির-বিদায় নিলগা। কিন্তু আশ্চর্য্য হান জনশ্রুতি বা খমকরা করপেকেও জয়দেব গোস্বামী গিরকে বিদায় নেনার আগে উপযুক্ত শিষ্য উগরাং কানমন্ত্ৰহান দিয়া মাতেছিল যেরাধামাধব প্রভুর সেবাপূজার ফাম এহান অদূর ভবিষ্যতে বৈষ্ণব বামুন ক্ষেত্রী কোন লেইরাপা সমাজ আহানে আয়া তোরাং ভিক্ষা মাগলে এরে ফাম এহান বিনামূল্যে দান করিস বারো কারৌ না বাগানিরকা এরে কান মন্ত্ৰএহান দেছিল বারো ও শিষ্য উগরে তা দৌর খয়া পানার আগে পরবর্তী শিষ্য উগরাং এহান কানমন্ত্ৰ হিসাবে দেনরেকা ইঙ্গিত দেছিল। এসাদে করে কানমন্ত্ৰ এহান বছর বছর বা যুগ-যুগ ধরিয়া চলিয়া আহের। পুরবর্তীতে পুণ্ডরীকাক্ষ এইগা গিরকর ভাগ্যে এহান জুটিল বুলিয়া জাতীয় ইতিহাসহান। তা থাকয়া প্রভুগোস্বামী গিরকর স্মৃতি রক্ষারকা বুলিয়া রাধামাধব প্রভুর শ্রীমন্দিরগোর কাদাত আরাক হরকাং স্মৃতি সৌধ আগো হংকরানি অইল, যোগো এবুঝ পেয়া সংরক্ষিক অয়া আছে। ও রাধামাধবজীউ প্রভুর মন্দির এলাকাউগোর ফাম উহানেই আমার বিঃ মণিপুরী সমাজর শ্রীশ্রী রাধামাধবজীউ প্রভুর মন্দিরগোর ফামহান বুলিয়া থাংনাত লিংখাত করা য়ারীও হারপেয়ার। এরে প্রভুর ফাম এহান জাত তথা বিঃ মণিপুরি সমাজর ইতিহাসে স্বর্ণাক্ষরে লেখা থাইতয়। এহান আমার সমাজর ঐতিহাসিক তথা ধর্মীয় মনোভাব আদান-প্রদান করিয়া আশ্রয় নেনার ফামহান, জাতীয় পয়লা ঐতিহাসিক ধর্মশালাগো বুলিয়া প্রমাণ পেয়ার।

(২) ধামর মন্দির প্রতিষ্ঠাতাশ্রীপুণ্ডরীকাক্ষ এইগার ভূমিকা :- পূজ্যপাদ প্রভুজয়দেব গোস্বামী গিরক এরে ভবমালেমেও চির-বিদায় নেনার পরবর্তী ঘটনা বা য়ারী খানি পরিষ্কার নার। তেবউ জনশ্রুতি বা কিংবদন্তী, বারো খমকরা করপেকেও গজর উল্লেখিত তথ্যমতে পেয়ারতাই যে জয়দেব গোস্বামী গিরকে পরবর্তী শিষ্য সামন্ত বা মহন্ত গোসাই দায়িত্ব সমঝাছে ওগরাং মাতিয়া গেছেগা যে কোন লেইরাপা সমাজর বামুন ক্ষেত্রী বৈষ্ণব গিরিগিথানায়ে সমাজরকা মাগলে ফাম এহান বিনামূল্যে দান করানির কানমন্ত্ৰ এহান ক্রমান্বয়ে শিষ্য আগরাংতো আরাক আগরাং সিলায় এরে ৪০০ বছর এহান চলিয়া আছে। পরবর্তীতে ১৭শ খৃঃ প্রতাপগড় লয়ার খালিবাড়ীর শ্রীমৎপুণ্ডরী কাক্ষ শর্মা এইগা গিরক তার যজমান করে কতগরেলো বৃন্দাবন ধাম পরিক্রমাত গিয়া তীর্থ করে দৌর মন্দির এতা বুলে বুলে হারপেইল যে এরে লেইরাপা বিঃ মণিপুরী এতারকা বৃন্দাবন ধামে খানা-পিনা-

থানার আশ্রয় ফাম আহান বা ধর্মশালা আগো নেই। যেতা আছে উতা অন্য সমাজর মানুরতা। এমন কিমৈতৈ মণিপুরী সম্প্রদায়র মানুরতা বৃন্দাবন ধামে আনেক ধর্মশালা বা সেবাকুঞ্জ আছে; যেপেইত পুণ্ডরীকাক্ষ এইগা গিরক আকখুলাগরে হুদা বামুনগো বুলিয়া থানারকা মৈতৈ সম্প্রদায়র মানুষে মাতেছি। বাকী উতারে কালিছা মলিয়া থানা নাদেছি। এইগা গিরকে ঔপেইত মাতেছিল যে ধামরমা বিঃ মণিপুরীরতা কোন ফাম নেই না কিতা বুলিয়া এইগা গিরক প্রভুরে ডাহে ডাহে কাদানি অকরল। মাতল যে সেবাপূজারমা জাতর পরিচয় না লাগের। এবেদে বারো লগর যজমান এতারে আলথক ঘরে দিয়া পেঠা দিল। এ সাদে এইগা গিরক লময়তেগা রাধাকুণ্ডধামে আয়া ফউঅইলা হা। পিছেদে শ্রীরাধাকুণ্ডগোর পশ্চিমপারে কাটা বনর হাদিত খালি ফাম আহান পেয়া এহানাত প্রভুর কৃপা পেইতে পারে বুলিয়া বারো এইগা ধ্যানে মগ্ন অইল। কতদিন খানা-পিনা বাদ দিয়া ধ্যান করানির থাংনাত হৌপনহান পারা করে দেহের যে পরম করুণাময় ঈশ্বরে ইঙ্গিত দেব যে এরে ফাম এহানেই লেইরাপা বিঃ মণিপুরী সমাজর তীর্থযাত্রীর উপযুক্ত আশ্রয় ফামহান। হৌপন হান হজাক অয়া টেইপাঙেদে চারিবারাদে চেয়া টটরল প্রভুরে আর না দেহের। পিছেদে এইগা গিরক ঢল ঢল কাদে কাদে মুচ্ছাগত অয়া পড়েছে। ঔ সময় উহানাত—হাংকার রাধামাধবজীউ মন্দিরর স্মৃতিসৌধগো হংকরেছিল প্রভুপাদ গোস্বামী গিরক উগ বেলিহান রংখা রংখা অয়া হমাযিতেগা উগ প্রভুর শ্রীমন্দিরে মঙ্গল আরতি করানিত বুলিয়া অইতে এরে মুচ্ছাগত অয়া পড়িয়া আছে বামুন এগরে দেহের। পিছেদে গোস্বামী গিরক উগউ তারে হৌপনেদেপ্রভু জয়দেব গোস্বামী গিরকে হৌদিন দিনে ভূমিদান করানিবকা মাতেছে ভক্ত উগ এরে এগো অইল পাউরি বুলিয়া এগোয় প্রকৃত ভক্তগো নিঙে পূজারী গিরকে শর্মা এইগা গিরকরে হমা দিয়া মাতের — “প্রভুপাদ জয়দেব গোস্বামী গিরকর স্মৃতিসৌধগোর কাদাত আছে তিন পোয়া পরিমান মাটি এহান তোমার সমাজরাং শ্রী শ্রী রাধামাধব জীউ শ্রমন্দির সেবা পূজারকা দান করলু। ঔপেইত মুচ্ছাগত শ্রীপুণ্ডরীকাক্ষ এইগা গিরক জ্ঞানহান ফিরিয়া মাতের, মোরাংতে তিনপোয়া মাটি লনার মত কোন তাংখা লিকল বা মূল্য দেনার ক্ষমতা হান নেই। ঔপেইত পূজারী গিরকে মাতের “দানসূত্রে কোন মূল্য না লাগের, তবে পূজ্যপাদ প্রভু জয়দেব গোস্বামী গিরকরকা বুলিয়া যে স্মৃতিসৌধগো আছে, ঔগত গুরুদেবর নিঙে নিক্কাকার বিয়ান-সেক্কা ফুল তুলসী, ধূপধুনা কিতা বারো শ্রীশ্রী

রাধা মাধব জীউর ভোগপ্রসাদ কাতকরে দেনা অক। উহান অইলে পূজ্যপাদ গোস্বামী ঠাকুর গিরকর আশা-ভরসা পূর্ণ অইতয়”। এহানর উত্তরে শ্রীমৎ পুণ্ডরীকান্ধ শর্মা এইগা গিরকে পাতাঙাই বুলিয়া য়াকরানির ফলে পূজারী গিরকে হারৌ অয়া কোন মূল্য বা তাংখা লিকল না লয়া তিন পোয়া মাটি সহ শ্রীশ্রী রাধামাধব জীউর বিগ্রহ চিরতরে দান করিয়া গেলগা।

(খ) প্রতিষ্ঠাতা সেবাইত পুণ্ডরীকান্ধ শর্মা গিরকর সমাজে অবদান :- শ্রীশ্রী রাধা মাধব জীউ মন্দির প্রতিষ্ঠাতা সেবাইত শ্রী পুণ্ডরীকান্ধ শর্মা গিরকে দান করা তিন পোয়া পরিমাণ মাটির মা-প্রভুর সেবাপূজা করানির দায়িত্বহান গ্রহণ করল। থাংনাত এইগা গিরকে ঘরে আলথক আয়া বিঃ মণিপুরী সমাজেও ধন সাম্পাল দিয়া পেঠেয়া চাংখল করে দেনারকা তার শিষ্য যজমান তথা আত্মীয় বর্গ হারিরে গাঙে গাঙে মাতিয়া প্রচার করল। এইগা গিরকর পৌ পানার লগে লগে প্রতাপগড় লয়ার মুণ্ডমালাগোরমা ভাঙর সভা আহান করিয়া সিদ্ধান্ত নিয়া হিঙ্গালা কাছাড়, ত্রিপুরা, ভানুঘাট, হাবি ফামেও নিয়মপারা ধন সাম্পাল দান করলা। ঔ ধন সাম্পাল উতালো এইগা গিরকে রাধাকুণ্ডত শ্রী শ্রী রাধামাধব প্রভুর মন্দির বারো মালঠৈপ কিতা হাবির সহযোগে, নিত্য সেবা পূজার মন্দির শ্রীবৃদ্ধি ভিক্ষালব্ধ চাদালো হংকরে দিল। এসাদে করে শ্রীমৎ পুণ্ডরীকান্ধ শর্মা এগিা গিরকে শুভ দোল পূর্ণিমা তিথিত ১২৭৩ বাংলা (১৮৬৬ইং) শ্রীশ্রী রাধামাধব জীউ প্রভুর মন্দির বারো মালঠৈপ সাংকা করল।

তাই এরে ১২৭৩ বঙ্গাব্দর (১৮৬৬ইং) শুভ দোল পূর্ণিমা তিথি এহান বিঃ মণিপুরী সমাজর ঐতিহাসিক চির স্মরণীয় দিনহান। এরে শুভ পূণ্য লগ্নে বিঃ মিঃ সমাজর পক্ষও শ্রীশ্রী রাধামাধব জীউ প্রভুর মন্দির লিংখাত করেছি দিনহান। এরে শুভ দিন এহানর তাৎপর্যর আরাক দিক আহান অইলতায় শ্রী শ্রী রাধামাধব জীউ মন্দির প্রতিষ্ঠাতা সেবাইত শ্রীমৎ পুণ্ডরীকান্ধ শর্মা এইগা গিরকরতাউ জন্মতিথি হান। বারো দৌর খয়া পাছেতাউ এরে দিন এহানাং। তা থকয়া, এরে শুভ দোল পূর্ণিমা তিথির খেলতামেও অকরিয়া পঞ্চম দোল অর্থাৎ দোল পূর্ণিমার পাচ দিনকার দিন উহানাত শ্রীশ্রী রাধামাধব জীউর মন্দির প্রতিষ্ঠা দিবস বারো কেন্দ্রীয় কমিটির পক্ষও বার্ষিক অধিবেশন হানউ চৌরাং করানির সিদ্ধান্ত নেছিগা। তা থকয়া এরে শুভ দিনর খেলতাম এহানবে জাত তথা সমাজর ঐতিহ্যর ঐতিহাসিক দিনহান বারো

প্রতিষ্ঠাতা সেবাইত পুণ্ডরীকাক্ষ এই গার নিঙে সেবাপূজা করানিরকা একান্ত ভক্তি নিষ্ঠা সহকারে চেষ্টা করানি থক।

(৩) প্রতিষ্ঠাতা সেবাইত শ্রীমৎ পুণ্ডরীকাক্ষ শর্মার উত্তরাধিকারীর কামকাজ :-

(ক) ১২৮২ বঙ্গাব্দে শ্রীমৎ পুণ্ডরীকাক্ষ শর্মা গিরকর গারিগো অচলাবস্থারমা সেবাপূজার কামে নিয়াম হীনপানিয়ে এই গা গিরকর কথামতে প্রতাপগড় নালিবাড়ীর সহপাঠী পণ্ডিত গোবিন্দ সিংহ (লৌকালপা পণ্ডিত) তার বেয়ক সান্ত্বিক ভাবাপন্ন রামদাস সিংহ গিরকরে দিয়াপেঠাদেনার থাংনাত শ্রীশ্রী রাধা মাধব জীউ মন্দিরে তারে সেবাইত নিযুক্ত করল বারো লগে সাধন ভজন রীতিনীতি হাবি শিক্ষা দিল। থাংনাত শুভ দোল - পূর্ণিমা তিথিত শ্রীমৎ পুণ্ডরীকাক্ষ এইগা গিরক নিংস্বাহান লালয়া এরে ভব মালেমেও গোবিন্দজীউর পাদস্পর্শে চিরবিদায় নিলগা। উতার থাংনাত পরবর্তী সেবাইত রামদাস সিংহ গিরকউ দ্যোর খয়া পেইলগা। উতার থাংনাত সেবাইত গুণমণি সিংহ গিরকর গারিগো অচলা বস্থা বারো দ্যোর খয়া পানার পরে সেবাইত না পেয়া সামায়িকভাবে গোস্বামী পরিবারেও আগো সেবাইত নিযুক্ত করানি আছিল।

(খ) রাধামাধবজীউ মন্দিরে শ্রীশ্রী ভুবনেশ্বর সাধুঠাকুরর আর্ভিবাব বারো কামকাজ উন্নতির চেষ্টা :- প্রায় ২২ বছর সময়রমা শ্রীশ্রী ভুবনেশ্বর সাধুঠাকুর শ্রীবৃন্দাবন ধাম পরিক্রমা কালে শ্রীল কৃষ্ণ দাস বৈরাগ্য ঠাকুর গিরকরাং দীক্ষিত অনার থাংনাত রাধামাধব প্রভুর শ্রীমন্দিরে হাদি হাদিত দর্শন করেছিল বারো প্রভুর সেবাপূজার কাম কাজ করিয়া গেছিলগা। নবদ্বীপ ধামর সেবাইতগো হিসাবে শ্রীশ্রী সাধুবাবা ভুবনেশ্বর ঠাকুর মেরাক-মেরাকে রাধাকুণ্ডরমা শ্রীশ্রী রাধামাধব প্রভুর মন্দিরে গিয়া সেবাইত গিরকরে সেবাপূজা করানির অনেক সৎপরামর্শ দিয়া প্রভুর শ্রীমন্দিরগোর কিসাদে উন্নতি অর, ঔহানার দিকে দৃষ্টিভঙ্গী দিল। এমন কি সমাজর ঔসময়কার এ, সি, এস অফিসার তনুবাবু সিংহ গিরকরে প্রভুর শ্রীমন্দিরর উন্নতিরকা যথাসাধ্য চেষ্টা করানির পরামর্শ দেছিল। সাধুবাবার এরে মধুরবাণী সমাজর মানুরাং চিরস্মরণীয়। এসাদে করে রাধাকুণ্ডরমা প্রভুর উন্নতিমূলক কামকাজে তীর্থযাত্রী দর্শনাভিলাষী গিরিগি থানীয়ে যথাসাধ্য দান করিয়া শ্রীশ্রী রাধামাধবজীউ মন্দিরগোর আরাকৌ খানি পরিবর্তন অইল।

(গ) তনুবাবু সিংহ গিরকর সেবাপূজার উন্নতির চেষ্টা বারো বিষ্ণুপ্রিয়া মৈতৈর

বিভাজনর সূত্রপাত :- সমাজর ঔ সময়কার উচ্চ শিক্ষিত এ, সি, এস অফিসার শ্রদ্ধেয় তনুবাবু সিংহ গিরক সাধুবাবার সৎ পরামর্শলো সেবাইতগো হিসাবে নবদ্বীপ ধাম গোবিন্দবাড়ী যেহানরে Gate way of the Indian pilgrimage বুলিয়া মাততারা ঔহানরে বারো রাধা মাধবজীউ শ্রীমন্দিরর সেবাপূজার উন্নতিরকা বুলিয়া খানি আহান আর্থিক সাহায্যালো অকরাগো দিল। বহুচিন্তা করিয়া গিরকে বিষ্ণুপ্রিয়া মণিপুরী বারো মৈতৈ মণিপুরী হাবি থাকর মানুরে আকপেইত বয়া উন্নতিমূলক আলোচনারকা ১৯৩০ সালের ডিসেম্বর মাহাত কাছাড়র লক্ষীপুর শ্রীমণ্ডপে বিরাট সভা আহানর ঠৌরাং করেছিল। ঔরে সভাত ইঙেনজাউসেনা রাজকুমার (মৈতৈ সম্প্রদায়) গিরকরে সভাপতিগো বরেয়া বিষ্ণুপ্রিয়া বারো মৈতৈ হাবি থাকর মানু পুলয়া রাধামাধব জীউ সেবাপূজা বারো আর আর কামর উন্নতির বিষয়ে আলোচনা করিয়া সিদ্ধান্ত নেনার চেষ্টা করানি অছিল। কিন্তু ঔরে সভাত বিঃ মণিপুরী সমাজর বিশিষ্ট মানু পুলছিলা উতায় বক্তব্য থনা পারলা; কিন্তু মৈতৈ সম্প্রদায়র কোনগয় বক্তব্য থনা নুরারানিয়ে পিছেকার দিনর সভাত আর তানু লাজপেয়া যোগদান না করলা। বরং বিঃ মণিপুরী সমাজর মানুর লগে তিলয়া কোন উন্নতিমূলক কাম কাজ না করানির সিদ্ধান্ত ভিতরেদে নিলাগা গোপনে। তা থকয়া লক্ষীপুর শ্রীমণ্ডপে পিছেকার দিনর সভাত সভাপতি ইঙেনজাউ সেনা রাজকুমার অনুপস্থিত থানায় শ্রী তনুবাবু সিংহ গিরকর সভাপতিত্বে সভার কাম চলেয়া যানা অছিল। ঔরে সভার পিছেকার দিন উহানাও বিষ্ণুপ্রিয়া বারো মৈতৈর তঙাল অনার সূত্রপাতহান। কিন্তু দ্বিযো সম্প্রদায়র বিরূপ মনোভাবহান বহু আগেও গরীব নওয়াজের আমলে বামাওতী ধর্মপ্রচার সময়ন্ত বীজগো উঠেছিল।

যেতাউ অক-থাংনাত ১৯৩১ ইংরেজীরমা ভারত সরকারর লোকগণনা বারো সিমলা কমিশনে মণিপুরী সম্প্রদায়রে উপজাতি বা ট্রাইবেল নাঙে চিহ্নিত করানির ফলে ১৯৩২ ইংরেজীর পয়লাবেদে বিখ্যাত ঐতিহাসিক শ্রদ্ধেয় মহেন্দ্র কুমার সিংহ, বি, এ, বি, টি সহকারী প্রধান শিক্ষক, করিমগঞ্জ সরকারী হাইস্কুল বারো শ্রীনন্দকিশোর সিংহ, প্রাক্তন বিধায়ক, শিলচর, গিরক দ্বিযোগির নেতৃত্বে সুরমা ভেলী মণিপুরী এসোসিয়েশন নাঙে জাতীয় সংস্থা আগো গঠন করানি অইল। ঔ সংস্থার মুখ্য উদ্দেশ্যহান বিষ্ণুপ্রিয়া বারো মৈতৈ দ্বিযো গোষ্ঠীরে এক করিয়া সমাজর উন্নতিমূলক কাম করানির নিভে “মণিপুরী” “মেখলী” ইত্যাদি বিঃ মণিপুরী ঠারলো পত্রিকা

নিকালনি অইল। কিন্তু দ্বিযো গোষ্ঠীর মিলনর কোন সূত্রপাত নাইল। মৈতৈ গোষ্ঠী, বিষ্ণুপ্রিয়া গোষ্ঠীও সম্পূর্ণভাবে তঙাল অনি অকরলা। এহানর ফলে বিষ্ণুপ্রিয়া-মৈতৈ গোষ্ঠী বিভাজনর সূত্রপাত আরাকৌ জবর অনা অকরল।

এসাদে অবস্থার পরিপ্রেক্ষিতে দ্বিযো সম্প্রদায়র ভিতরে অনৈক্যর মনোভাব জবর অইল। আরাক আকবেদে ১৯৩১ ইংরেজীত শেষভাগে বৃটিশ ভারত সরকার লোকগণার ভিত্তিতে সিমলা কমিশনে মণিপুরী সম্প্রদায়রে উপজাতি বা ট্রাইবেল নাঙে সনাক্ত করানির ফলে ১৯৩২ ইংরেজীর পয়লাবেদে এ, সি, এস অফিসার শ্রদ্ধেয় তনুবাব সিংহ বারো মহেন্দ্রকুমার সিংহ বি, এ, বি, টি গিরকগাছির সৌজন্যে আগরতলার রাধানগর শ্রীমণ্ডপে বিঃ মণিপুরী হাবিহানে তিলয়া পয়লা বিরাট সভা আহান করিয়া বৃটিশ সরকাররং বিঃ মণিপুরী সম্প্রদায় পার্বত্য উপজাতি নাগয়, “ক্ষত্রিয় বর্ণহিন্দু” বুলিয়া সংরক্ষিত নথিপত্রলো জোরদার দাবী জানেইলা। ফলে ১৯৩২ ইংরেজীর বৃটিশ সরকার মিঃ জেঃ বিঃ ব্রাকার সাহেবর সৌজন্যে বাধ্য অয়া মণিপুরী সম্প্রদায় দ্বিযো গোষ্ঠীরে বর্ণহিন্দু বুলিয়া ঘোষণা করল; যদিযৌ আমার সমাজর ও সময়র বিশিষ্ট শিক্ষিত গণ্যমান্য গিরিগিথানীয়ে অগ্রণী ভূমিকা নেছিলাগা।

এপেইত ঐতিহাসিক দৃষ্টিভঙ্গীলো আহান উল্লেখ করানি থক যে পার্বত্য উপজাতি বুলিয়া বৃটিশ সরকারে উল্লেখ করেছে; উহান প্রতিবাদ করতেগা মৈতৈ বেইবুনিযে কিন্তু তানুর মৈতৈ শব্দগো বাদ দেনাং হংনা করতেগা ১৯৩২ ইংরেজীরমা মৈতৈ বারো বিষ্ণুপ্রিয়া উভয় সম্প্রদায়রমা তিলনির বা মিলনর পথগো দূরেইর অইল। এসাদে করে বিষ্ণুপ্রিয়া মণিপুরী ঐতিহাসিক তথ্যর গজে নির্ভর করিয়া বৃটিশ সরকার মণিপুরী সম্প্রদায়রে (বিষ্ণুপ্রিয়া বারো মৈতৈ) পার্বত্য উপজাতিত্ব আলাদ করিয়া বর্ণহিন্দু বুলিয়া ঘোষণা করল। উতার থাংনাত স্বাধীনতার পিছেদে ১৯৫৬ ইংরেজীর ভাষা ভিত্তিক রাজ্য পূর্নগঠন বিন্যাস আইনর সুযোগ নিয়া মৈতৈ সম্প্রদায় আগর সিদ্ধান্তরে পরিবর্তন করিয়া ১৯৬১ ইংরেজীর লোকগণনার সময়ত জাতহান সুদৃঢ়ভাবে প্রতিষ্ঠা করানির উদ্দেশ্যলো “মৈতৈ” শব্দ এগো বাদ দিয়া “মণিপুরী” বুলিয়া পরিষ্কার ভাবে লিপিবদ্ধ করেছি; যেহান পরবর্তীতে ১৯৮৬ ইংরেজীতে মণিপুর বিধান সভাত বিল পাশ করিয়া আরাকৌ দৃঢ়পদক্ষেপ নিলাগা। এসাদে বিভিন্ন কারণলো বিষ্ণুপ্রিয়া মৈতৈ সম্প্রদায় বা গোষ্ঠীর ভিতরে মিল কমছে। উতা এবাকা মূল চর্চার বিষয় নাগয়, হুদা রাধামাধবজীউ প্রভুর ধর্মীয় সংগঠনর

উদ্দেশ্যে নিয়া জাতর অস্তিত্ব রক্ষার ব্যপারে তিলনির হৎনা করতেগা সুফল নাইল, তবে বর্তমানে উতার বহু পরিবর্তন অইল — সুপ্রীম কোর্টর রায়দানে জাতর অস্তিত্ব বা পৃথক সত্তা প্রমাণ অইল।

(ঘ) পয়লাকার বিঃ মণিপুরী বিরাট সভা কার্যকরী সমিতি :- স্বাধীনতার আগের সামাজিক পরিস্থিতি বিচার বিবেচনা ক্রমে সমাজর উন্নতির হৎনায় অন্যান্য উদ্দেশ্যর লগে শ্রীশ্রী রাধামাধবজীউ সেবাপূজার কামহান মুখ্য উদ্দেশ্য হানর নিভে বিভিন্ন চেষ্টার ভিতরেদে ১৯৩২ ইংরেজীর মার্চ মাহাত শ্রদ্ধেয় শ্রী তনুবাবু বারো শ্রীমহেন্দ্র কুমার সিংহ গিরক গাছির চেষ্টায় সমাজর বহু জ্ঞানী, গুণী বিভিন্ন গিরি গিথানীরেলো প্রতাপগড়র গোকিলাগাঙে বিরাট সভাহানর লিংখাত করানি অছিল, যেহান পরবর্তীতে ‘মহাসভা’ নাঙলো কাম চলিয়া আহের। ঔ বিরাট সভার পয়লা কর্মকর্তার নাং বারো গাং থাংনাত সাতকরানি অইল—

১৯৩২ ইংরেজীর বিরাট সভা সমিতি

- (১) সভাপতি - শ্রদ্ধেয় শ্রী তনুবাবু সিংহ, সিলেট
- (২) সম্পাদক - শ্রদ্ধেয় শ্রীগন্ধরাজ সিংহ চৌধুরী, পাথারকান্দি।
- (৩) সদস্য - সর্বশ্রী নীলেশ্বর মুখার্জী - মাসিমপুর।
- (৪) সদস্য - রুদ্র সিংহ চৌধুরী - কৈলাশহর।
- (৫) সদস্য - প্যারীমোহন সিংহ - হাওর, ত্রিপুরা।
- (৬) সদস্য - কীর্তি উকিল চৌধুরী - কৈলাশহর।
- (৭) সদস্য - খাইসৌ সিংহ - ফটিকরায়, শ্রীপুর।
- (৮) সদস্য - ব্রজধন সিংহ - কমলপুর।
- (৯) সদস্য - বলাই চৌধুরী - কাঞ্চনবাড়ী।
- (১০) সদস্য - শ্রী নিত্যাইচাঁদ সিংহ, রাজবাড়ী, ধর্মনগর।
- (১১) সদস্য - বঠাসিং পণ্ডিত, তিনখাল।
- (১২) সদস্য - পণ্ডিত সুত সিংহ, নালিবাড়ী।
- (১৩) সদস্য - রামকৃষ্ণ শর্মা (পুত্তরীক্ষ শর্মারপুত্র) খালবাড়ী,
- (১৪) সদস্য - পণ্ডিত সিংহ কাব্যরত্ন, নালিবাড়ী।
- (১৫) সদস্য - সার্বভৌম চাটার্জী - পুঃ কৃষ্ণনগর, সিংলা।

- (১৬) সদস্য - কুলচন্দ্র সিংহ - খিলুয়া কৃষ্ণনগর।
 (১৭) সদস্য - নিত্যাই সিংহ - কৃষ্ণনগর, সিংলা।
 (১৮) সদস্য - নদীয়া সিংহ - বেতুবাড়ী, সিংলা।
 (১৯) সদস্য - রামসিংহ, ফরেষ্টার, পাথারকান্দি।
 (২০) সদস্য - কৃষ্ণকুমার সিংহ, হেডপণ্ডিত, পাথারকান্দি।
 (২১) সদস্য - শ্যামানন্দ রাজকুমার, দুধপুর, কাছাড়।
 (২২) সদস্য - চিংখেই সিংহ, রাজকুমার, রাজনগর, কাছাড়।
 (২৩) সদস্য - কুঞ্জেশ্বর সিংহ - ভকতপুর, কাছাড়।
 (২৪) সদস্য - বিনোদবেহারী, পণ্ডিত, বিক্রমপুর, কাছাড়।
 (২৫) সদস্য - মানিক সিংহ কাব্যরত্ন, নরসিংপুর, কাছাড়।
 (২৬) সদস্য - সেনা সিংহ পোষ্ট মাষ্টার, নরসিংপুর, কাছাড়।
 (২৭) সদস্য - নন্দকিশোর সিংহ - নরসিংপুর, কাছাড় (প্রাক্তন এম, এল, এ)
 (১৮) সদস্য - নদীয়া সিংহ, ধলিবিলা, কাছাড়।
 (২৯) সদস্য - মৈনো সিংহ - ঝাপিরবন্দ, সোনাপুর।

(৪) শ্রীশ্রী রাধামাধবজীউ সেবাপূজার থাংনাকার পদক্ষেপ :- ১৯৩৭ সালে বিঃ মণিপুরী বিরাট সভার উদ্যোগে প্রতাপগড় লয়ার তিনখাল শ্রীমণ্ডপে বিরাট সভার অধিবেশন হান অনুষ্ঠিত অইল। ঔ সভারমা শ্রদ্ধেয় তনুবাবু সিংহ গিরকর নেতৃত্বে (সভাপতিত্বে) সমাজর কাম কাজর শৃঙ্খলা আনানির হংনায় থাংনাত ইকরা শাখাকমিটি আকেইহান অইল।

(১) শ্রীশ্রী রাধামাধবজীউ মন্দির সেবা কমিটি।

(২) বিঃ মণিপুরী সাহিত্য পরিষদ।

(৩) বিঃ মণিপুরী সংস্কৃতি পরিষদ।

এসাদে করে বিঃ মণিপুরী সমাজর উন্নতির পথগো ইলনির মাতুমে ধর্মীয় অনুষ্ঠান শ্রীশ্রী রাধামাধবজীউ মন্দিরর সেবার কামকাজ করানির গজে গুরুত্ব দেনা আছিল। ঔ বিরাট সভাত হাবির সর্বসম্মতি ক্রমে শ্রীশ্রী রাধামাধবজীউ মন্দির সেবা কমিটির সভাপতিগো হিসাবে শ্রদ্ধেয় শ্রী তনুবাবু সিংহ গিরক বারো সম্পাদক হিসাবে শ্রদ্ধেয় শ্রী গন্ধরাজ সিংহ চৌধুরী, রাজারগাঁও, পাথারকান্দি গিরকরে লেপকরানি অছিল। শ্রদ্ধেয় গিরক দ্বিযোগিরে চিন করিয়া বিরাট সভার উদ্যোগে হাবি গিরি

গিথানীর হৃৎনায় শ্রীশ্রী রাধামাধব জীউ সেবার কামর উন্নতির হকে বারো সমাজর সাহিত্য সংস্কৃতির গজে গুরুত্ব দিয়া বছরকী বিরাট সভা চলেছিল। বিশেষ করিয়া ও বাকাও চিনকরিয়া বিঃ মণিপুরী ঠারর স্বীকৃতির বিভিন্ন চেষ্টা চালানি অছিল। ও কাম কাজর পরিপ্রেক্ষিতে স্বাধীনতার আগর হাকতাকে সমাজর স্বনামধন্য ঐতিহাসিক শ্রদ্ধেয় মহেন্দ্র কুমার সিংহ, বি, এ, বি, টি গিরকর জাতর উৎপত্তি সম্পর্কে ইতিহাস সম্বলিত তথ্য সহ “মণিপুরের প্রাচীন ইতিহাস” লেংকরিয়া সর্বজন স্বীকৃত অছিল। গিরকর লেংকরা ইতিহাস ও সময়র সরকারর অনুমোদন লাভ করেছিল। মণিপুরর মৈতৈ বেইবুনি হাবি মুক্ত অছিল। গিরকর লেংকরা মণিপুরর প্রাচীন ইতিহাস সমাজে ঐ সময় ভাষা সংক্রান্ত বিষয়ে নবজাগরণ আহানর জোয়ার কাকরে দিল। ও ইতিহাস নথি পত্রের কেন্দ্র করিয়া সমাজে ইমাঠারে বিভিন্ন পত্র পত্রিকা নিকুলিল বারো শিক্ষিত ছাত্র-যুব সমাজ বেইবুনিহাবি অনুপ্রাণিত অইলা। কিন্তু পরে জাতর লকেই বা গোষ্ঠীর ভিতরে গোত্র নিয়া বারো লকেইর সমালোচনালো সমাজর ভিতরে বিভিন্ন সমস্যা অইল থাংনাত ১৯৫৬ ইংরেজীর সিংলার আন্দুরগাঙে অতি গুরুত্বপূর্ণ বিরাট সভা আহানর ঠোরাং করানি অছিল; যেহানাং বিরাট সভা নাঙহান পরিবর্তন করিয়া বিঃ মণিপুরী মহাসভা নাঙহান লিপিবদ্ধ করানি অছিল। পিছেদেত্ব সমাজর বিভিন্ন লয়াত মহাসভার অধিবেশন চলিয়া আহের। মহাসভার প্রত্যেক বছরকী অধিবেশনে ভাষা স্বীকৃত বারো শ্রীশ্রী রাধামাধবজীউ মন্দির সেবা পূজার ব্যাপারে মুখ্যভাবে আলোচনা চলের।

কিন্তু ১৯৬১ ইংরেজীর লোকগণনার সময়মত সরকার পক্ষত্ব বিঃ মঃ ঠারর মানু অতি কম লেপকরেছিল। বিঃ করিয়া প্রতাপগড় লয়ারমা বেয়াপা আকগো বুলিয়া লেপকরানি অছিল। এহেন অবস্থার পরিপ্রেক্ষিতে মহাসভার পক্ষও সরকাররাং জোড়দার প্রতিবাদ বারো দাবী জানানি অইল। এসাদে করে ১৯৬৫ ইংরেজীরমা মহাসভা সামাজিক মুখ্য সংগঠন হিসাবে রেজিস্ট্রেশন করানি অইল; রেঃ নং-৯৪/১৯৬৫ইং/ ওহানর থাংনাত পরবর্তী পদক্ষেপ হিসাবে ভাষা পরিষদ, আন্দোলন পরিষদ, সংস্কৃতি পরিষদ, ছাত্রসংস্থা, সাহিত্য পরিষদ বারো শ্রীশ্রী রাধামাধব জীউ সেবাপূজা কমিটি বুলিয়া বিভিন্ন শাখা কমিটি হঙইল। সমাজহান জবর আন্দোলনমুখী নেতৃত্বর ছতগলো চালিল। প্রত্যেক অধিবেশনে সাত দফা দাবী আদায়র লগে শ্রীশ্রী রাধামাধবজীউ সেবা পূজা মুখ্য বিষয় হিসাবে আলোচনা অছিল।

এহানর থাংনাত মহাসভার নেতৃবৃন্দ বারো কর্মীবৃন্দর ভিতরে নীতিগত পার্থক্য দেহাদেহিছিল। এসাদে করে দ্বিযো সমান্তরাল মহাসভার পক্ষও বিভিন্ন ভিত্তিতে ১৯৮১ ইংরেজীর ভারতসরকারর লোকগণনারমা বিঃ মণিপুরী ঠরেহানর পরিসংখ্যান স্বীকৃতি সরকারী ভাবে লিপিবদ্ধ আছিল। এহানাত ঔ সময়র বিশিষ্ট ব্যক্তি নন্দকিশোর সিংহ, প্রাক্তন এম, এল, এ গিরকর ভূমিকা গুরুত্বপূর্ণ। যাইহোক মতভেদ দেহাদেনায় ১৯৮০ ইংরেজীর সিংলা পাতিয়ালা মহাসভার অধিবেশনেও খেই করিয়া সমান্তরাল ভাবে দুহান মহাসভা কতবছর চলিল। কিন্তু দ্বিযো সমান্তরাল মহাসভার অধিবেশনে রাধামাধবজীউ সেবাপূজা আলোচনা গুরুত্ব পাইল। যেতাউ অক, পিছেদে শ্রী শ্রী রাধামাধবজীউ কমিটির আপ্রাণ চেষ্টায় প্রতাপগড়র লয়ার তিনখাল শ্রীমণ্ডপে সমান্তরাল ভাবে চলেছে মহাসভা দ্বিযোহনরে একত্রিত করানিরকা বুলিয়া গণ অভিবর্তন আহানর চৌরাং করানি অছিল। কিন্তু দ্বিযো তঙাল মহাসভার কর্মকর্তা কমিটির দাপা আহান উপস্থিত নানার ফলে সিদ্ধান্ত নাইল। পরবর্তীতে কতমাহার থাংনাত ১৯৮৪ইং জুন মাহাত সিংলার গড়েরবন্দর গিরিগিথানীর প্রচেষ্টায় দ্বিযো মহাসভাবে আকতা করানির হংনলো বিশেষ মিলন সভা আহান অইল। যেহানাত সাময়িকভাবে কাম চলানিরকা বুলিয়া দ্বিযো মহাসভার পক্ষও সাময়িক কমিটি আহান হংকরানি অছিল; বারো পূর্ণাঙ্গ কেন্দ্রীয় কমিটি আহান হং করানিরকা সিংলার আমরখাল শ্রীমণ্ডপে অধিবেশন হান ডাহানি অইল ১৯৮৪-১৯৮৫ ইংরেজীর ফেব্রুয়ারী মাহাত। কিন্তু দুর্ভাগ্যবশতঃ আকতা করিয়া কমিটি আহান হংকরানির প্রচেষ্টা নিষ্পল অইল। নীতিগত পার্থক্যর ভিতরেদে দাপা আহান অমরখাল শ্রীমণ্ডপ অধিবেশনেও নিকুলিয়া অইলা। ঔ দাপা উহান দ্বিখণ্ডিত নাঙলোতঙাল মহাসভা না হংকরানির হংনায় অর্থাৎ সমাজর স্বার্থর নিঙে সমান্তরালভাবে আরাক মহাসভা আহান না করানির ওয়াসাক করিয়া সমাজর সাহিত্য সংস্কৃতির উন্নতির হকে আরাকৌ বলিষ্ট পদক্ষেপ নেনারকা তঙালভাবে সাহিত্যসভা নাঙে করিমগঞ্জ বৈঠকে সিদ্ধান্ত নিয়া সংগঠন আহান হংকরনি অইল। রেঃ মং নং ৭৪/১৯৮৪-৮৫। পিছেদে সাহিত্য সভার কাম কাজ অনেক আগ বাড়ানি অকরল। আরাক আকবেদে মহাসভা তার নিজস্ব কর্মপন্থা নির্ধারণ করিয়া আগ বাড়ানি অকরল। কিন্তু এহানাত গুরুত্বপূর্ণ যারীহান অইলতায় সাহিত্যসভা বারো মহাসভা দ্বিযো সংগঠনর বছরকী অধিবেশনেউ রাধামাধবজীউ প্রভুর কৃপায় সেবাপূজার আলোচনার গুরুত্ব স্থানপেয়া

আহের, যেহানাত মূখ্যকর্মকর্তা আচার্য উদয় চন্দ্র সিংহ গিরক, বারো লগে সৈবাপূজার কর্মকর্তা থাইতারা।

(৫) শ্রীশ্রী রাধামাধব জীউ স্বাধীন সংগঠন হিসাবে রেজিস্ট্রেশন বারো উন্নতির সিজিল ১৯৮৫ ইংরেজীও সমাজরমা সাহিত্যসভা বারো মহাসভা বুলিয়া দুহান নেতৃস্থানীয় সংগঠন চলেছিল হায়হান; কিন্তু দুহান সংগঠন চলানির ভিতরেদে শ্রীশ্রী রাধামাধবজীউ সেবাপূজারমা অসুবিধা দেহাদিতে পারে বা সমস্যার সৃষ্টি অইতে পারে বুলিয়া কোন সংগঠনের অধীনে বা আয়ত্তে না থায়া নিজস্ব সত্তার ভিতরেদে ধর্মীয় মনোভাব বা আধ্যাত্মিক চেতনার পথগো ইলয়া সমাজসেবার নিঙে শ্রী শ্রী রাধামাধবজীউ সেবা পূজা সমিতি বুলিয়া তঙাল করে সামাজিক ধর্মীয় সংগঠন আহান রেজিস্ট্রেশন করানি অইল। রেজিস্ট্রেশন নং ৭৪/১৯৯৪ইং। উহানর নাং শ্রীশ্রী রাধামাধবজীউ সেবা পূজা সমিতি।

প্রসঙ্গতঃ উল্লেখ করানি থক যে ১৯৯৪ ইংরেজীর মার্চ মাহাত সিংলা আঞ্চলিক বার্ষিক সাধারণ অধিবেশন পাচডালীরমা সমাজসেবারী শ্রীযুক্ত সেনাতাম্ফা গিরকে শ্রীশ্রী রাধামাধব জীউ মন্দির পুনর্নির্মাণর প্রস্তাব আনেছিল। ঐ সভাত মি স্বয়ং উপস্থিত আছিল। ঐ প্রস্তাবরে ভিত্তি করিয়া ১৯৯৪ ইং অক্টোবর/ নভেম্বর মাহাত প্রতাপগড় গোকিলাগাঙে রাধামাধবজীউ কেন্দ্রীয় কার্যকরী সভাত আরাকৌ জোড়দার করে শ্রীমন্দির পুনর্নির্মাণর জোড়ালো প্রস্তাব গৃহীত অইল। থাংনাত ১৯৯৪ইং ২৫ ডিসেম্বর প্রতাপগড় তিনখাল ভীমদেব শর্মা এইগা গিরকর শ্রীমণ্ডপে শ্রীশ্রী রাধামাধবজীউ কেন্দ্রীয় বিশেষ অধিবেশনে মন্দির পুনর্নির্মাণর জোড়ালো প্রস্তাব সিদ্ধান্ত আকারে গৃহীত অইল।

থাংনাত ১৯৯৭ ইংরেজীরমা মার্চে ১১৭ তম শ্রীশ্রী রাধামাধবজীউ কেন্দ্রীয় সাধারণ অধিবেশনে সিংলা লয়ার রূপাগ্রাম শ্রীমন্দিরে মন্দির পুনর্নির্মাণ সিদ্ধান্ত চূড়ান্তভাবে কার্যকরী করানিরকা শ্রীযুক্ত শ্যামসুন্দর সিংহ গিরকরে সভাপতিত্ব চিনকরিয়া কার্যকরী কমিটি আহান হংকরানি অইল। ঐদিন কার মন্দির পুনর্নির্মাণর কাম কাজর অগ্রগতিরকা বিষ্ণুপুর শ্রীমণিভূষণ সিংহ গিরকে ১০০.০০ হান তাংখা দিয়া অকরাগ দেছিল বুলিয়া পৌ পানা অছিল।

যেতাউ অক এসাদে করে রেজিস্ট্রেশন করানির থাংনাত শ্রীশ্রী রাধামাধবজীউ সেবা-পূজা সমিতি হঙইল, বিধি-বিধানাবলী বা সাংবিধানিক প্রস্তাবাবলী গৃহীত

অইল। ঔ প্রস্তাবাবলীর মাতুম ইলয়া শ্রীমন্দিরর উন্নতির সিঁজিল করানির হংনায় সমাজর হাবি লয়াত আঞ্চলিক কমিটি বারো গাং কমিটি বা শাখা কমিটি হংকরানি আছে, যেতার মাধ্যমে নিয়মিতভাবে সেবাপূজার কামে চাদা আদায় করিয়া কেন্দ্রীয় কমিটিত জমা দিতারা বারো কেন্দ্রীয় কমিটির পক্ষও রাধাকুণ্ডরমা সেবাপূজারকা বুলিয়া সেবাইত গিরকরাং তাংখা দিয়া পেঠাদিতারা। সেবা-পূজা বারো শ্রীমন্দির হংকরানির ব্যাপারে বারো ধর্মীয় আলোচনার পরিপ্রেক্ষিতে বছরে তিন চারিখুরুম কেন্দ্রীয় কমিটির সভা বারো তিন-বছর অন্তর কেন্দ্রীয় সাধারণ অধিবেশন অর। ঔ অধিবেশনে কেন্দ্রীয় কমিটি পূর্নগঠন অর। বারো হাবির অবগতিরকা অধিবেশনে সম্পাদকীয় প্রতিবেদন পাঠ করানি অর বারো আয় ব্যয়র কাম-কাজ হিসাব পরীক্ষকর মাধ্যমে পরীক্ষা করানির থাংনাত ছাপোয়া বিলি করানি অর। থাংনাত সাধারণ সভার পক্ষও আয়-ব্যয়র হিসাবর অনুমোদন নেনা অর।

এসাদে করে শ্রীশ্রী রাধামাধবজীউ প্রভুর কৃপায় আঞ্চলিক কমিটির কর্মকর্তাগিরি গিথানীরাংতো চিনকরে কেন্দ্রীয় কমিটির কর্মকর্তা গিরি গিথানী হাবিহানে শ্রী মন্দিরর উন্নতির সিঁজিলর কামে পূর্নউদ্যমে ভূমিকা নেছিগা; এহান সমাজরকা ধর্মশালার আশ্রয় নেনার কামে বারো জাতর ধর্মীয় মনোভাব পরিচয় দেনার কাম কাজে অতি গুরুত্বপূর্ণ অধ্যায়হান। এহানাত সমাজর লেইরা নুঙেইপা হাবি থাকর ভক্ত মানাই গিরিগিথানীয়ে পাংলাক করানি থক। বছরে ধান আক কাঠি, দ্বিকাটি বা তাংখা ১০/১৫ হান সাহায্যলো সেবাপূজার কাম কাজ চলতে পারে। কিন্তু শ্রী মন্দির পুনর্নির্মাণর ব্যাপারে সামর্থ্যর ভিত্তিতে দশ-গিরিগিথানীয়ে কমপক্ষে ৫০০ হান তাংখাও চিনকার গজে যোগেয় যেতা পারিল সাহায্যলো দান, মন্দির পূর্ন নির্মাণ বারো উন্নতির সিঁজিল তুরায়া অইতয় এহানাত শ্বেনেয়। “দানম পূণ্যকর্মম” নিঙে সাহায্য করানি থক।

(৬) রাধামাধব জীউ শ্রী মন্দিরর কামাদার বা সেবাইতর নাং বারো ঠিকানা :-

(১২৭২ বঙ্গাব্দও ১৪১৪ বঙ্গাব্দ পেয়া অর্থাৎ ১৮৬৫ ইংরেজীও ২০০৬ ইং পেয়া)

(১) ১ম শ্রীমৎ পুন্ডরীকাক্ষ শর্মা পঞ্চতীর্থ - প্রতাপগড়।

(স্থাপয়িতা বা লিংখাতপা) মন্ত্রীগ্রাম ১২৭২ বঙ্গাব্দ বা ১৮৬৬ ইংরেজী ১০ বছর।

(২) ২য় শ্রী রামদাস সিংহ, নালিবাড়ী - ১৮৭৫ ইংরেজী (১২৮২ বাংলা) ১০ বছর।

(৩) ৩য় শ্রীগুণমণি সিং, ভানুগাছ - ১৮৮৫ ইং (৭বছর) ১২৮৯ বাংলা।

- ✓(৪) শ্রী ভানুচন্দ্র সিংহ, ভানুগাছ - ১৮৯৩ইং - ৮ বছর (১২৯৭বাংলা)।
 (৫) ভূমিদাতা গোস্বামীর বংশধর - ১৯০২ ইং ৯ বছর (১৩০৬বাংলা)।
 (৬) শ্রী আমৃতল সিংহ, কমলপুর - ১৯১২ ইং ১০ বছর (১৩১৫বাংলা)।
 (৭) শ্রী কমল সিংহ - ধলাই (কাছাড়) ১৯২১ ইং - ১০ বছর (১৩২৫বাংলা)।
 (৮) শ্রী শ্যামদাস সিংহ রাতাছড়া - ১৯২৫ ইং ৫বছর (১৩৩০বাংলা)।
 (৯) শ্রী লক্ষীকান্ত সিংহ - বিক্রমপুর - ১৯৩০ ইং - ৫বছর (১৩৩৪বাংলা)।
 (১০) শ্রী অন্নরচাদ সিংহ, কৈলাশহর (১৯৩৪ইং) ৩ বছর (১৩৩৬বাংলা)।
 ✓(১১) শ্রী পুরেল শর্মা, শ্রীপুর - ১৯৩৮ ইং - ২বছর (১৩৩৯বাংলা)।
 (১২) শ্রী জগদীশ বাবা, প্রতাপগড় - ১৯৪০ ইং - ১১বছর (১৩৪১ বাংলা)।
 (১৩) শ্রী নারদ বাবা সিংলা - মদনপুর (১৯৫১ ইং) ৪ বছর (১৩৫২বাংলা)।
 (১৪) শ্রী গোপাল দাস কাছাড় - (১৯৫৫ ইং) ৪ বছর (১৩৫৬বাংলা)।
 (১৫) শ্রীমতি চাউবিতল দাসী - শিলচর, সিঙ্গারী- ১৯৫৯ ইং - ৬ বছর (১৩৬০ বাংলা)।
 (১৬) শ্রী রাধারমন সিংহ - ঝামিরালা - ১৯৬৫ ইং - ৫ বছর (১৩৬৬বাংলা)।
 (১৭) শ্রী কালাধন সাধু - কচুবাড়ী - (মেরাক মেরাকে) - ১ বছর ১৯৭০ ইং (১৩৭১বাংলা)।
 (১৮) শ্রী রাধারমন সিংহ - কাছাড়, সিঙ্গারী - ১৯৭২ইং - ১ বছর (১৩৭২বাংলা)।
 (১৯) শ্রী উদয় সিংহ (দয়াল দাস) - প্রতাপগড় - ১৯৭৩ইং - ১বছর (১৩৭৩বাংলা)।
 (২০) শ্রী মদনমোহন সিংহ - নরসিংপুর- (১৯৭৩ইং ৯৪ইং) ২১ বছর (১৩৭৩-৯৪ইং) ৩বছর।

মদনবাবা (দ্যৌর খয়া পানার আগমুহূর্ত পেয়া)

- (২১) শ্রী কমলেশ সিংহ - ঝাপিরবন্দ (১৯৯৪ইং-৯৭ইং) ৩বছর (১৩৪৯বাংলা - ৯৭বাংলা)।
 (২২) শ্রী মণিকান্ত সিংহ - ভকতপুর - কতমাহা (১৯৯৭ইং) - (১৩৯৭বাংলা)
 (২৩) শ্রী রমন সিংহ কাছাড়, সিঙ্গারী - কতমাহা - (১৩৯৭ বাংলা) (১৯৯৭ ইং)
 (২৪) শ্রীমতী ললিতা দাসী (বাসন্তী) নালিবাড়ী - কতমাহা (১৯৯৭ইং)

(১৩৯৭বাংলা)।

(২৫) শ্রী মদন শর্মা, রাধাকুঞ্জ, রামামন্দির - কতমাহা ১৯৯৭ইং (১৩৯৭বাংলা)।

(২৬) শ্রী রামনারায়ণ সিংহ জিরিবাম - (১৯৯৭ - ২০০১ইং) ৪ বছর (১৩৯৭-১৪০১বাংলা)।

(২৭) শ্রী বনবীর সিংহ দায়িত্বে কতমাহা (২০০১ইং-২০০৪ইং) ৩ বছর (১৪০১ বাংলা - ১৪০৫বাংলা)

(আওর, ধর্মনগর)

(২৮) শ্রী কৃষ্ণকান্ত সিংহ (মাছুঘাট) ২০০৪ ইংরেজীও বর্তমান পেয়া (তালিকাহান পরবর্তীতে আরাকৌ অন্তর্ভুক্ত অইতয়)।

(৭) রাধামাধবজীউ সেবাসমিতির তালিকা (অকরাওপুরি):-

(১) ১ম - সভাপতি - শ্রী তনুবাবু সিংহ - এ সি এস - ১৯৩৭ ইং সিলেট।

(বিরটি সভা বারো রাধামাধবজীউ কমিটি)

সাধারণ সম্পাদক - শ্রী গন্ধরাজ সিংহ চৌধুরী, প্রতাপগড়, রাজারগাঁও।

(২) ২য় সভাপতি- সমরজিৎ সিংহ, সাবজজ, পাথারকান্দি — (১৯৫০ইং-৫৪)

(তনুবাবুর পুতক)

সাঃ সম্পাদক - কৃষ্ণকুমার সিংহ, হেডপণ্ডিত, পাথারকান্দি।

(৩) ৩য় - সভাপতি - হেডপণ্ডিত কৃষ্ণকুমার সিংহ, রাজারগাঁও, পাথারকান্দি, সম্পাদক - ডাঃ রাজেন্দ্র কুমার সিংহ, পাথারকান্দি(১৯৫৪ইং-৫৬)

(৪) সভাপতি - ডাঃ রাজেন্দ্র কুমার সিংহ, প্রতাপগড় - উনাম গাঁও, সম্পাদক শিক্ষক হরেন্দ্র কুমার সিংহ (উনাম গাও) (১৯৫৬-৬০ইং)

(৫) সভাপতি - ডাঃ রাজেন্দ্রকুমার সিংহ (১৯৬০-৬৫ইং) পাথারকান্দি।

সম্পাদক - শিক্ষক নীলকান্ত সিংহ, রাজারগাঁও।

(৬) সভাপতি - ক্ষীরোদ বেহারী সিংহ, শিক্ষক প্রতাপগড় - পারুলগাঁও। (১৯৬৫-৭০ইং)

সম্পাদক - শিক্ষক নীলকান্ত সিংহ - রাজারগাঁও।

(৭) সভাপতি - ক্ষীরোদ বেহারী সিংহ - শিক্ষক - প্রতাপগড়, পারুলগাও (১৯৭০-৭২)

সম্পাদক - আচার্য উদয়চন্দ্র সিংহ, হেডমাষ্টার, নালিবাড়ী এম, ই (১৯৭২ইং)

- (৮) সভাপতি - শ্রী ক্ষীরোদ বেহারী সিংহ, শিক্ষক (৩২ তম মহাসভা অধিবেশন)
পারুগাঁও (১৯৮০ইং)
সাঃ সম্পাদক - আচার্য উদয় চন্দ্র সিংহ, নালিবাড়ী।
- (৯) সভাপতি - শ্রী ভীমদেব শর্মা, তিনখাল - ১৯৮০ইং (৩৩ তম মহাসভা অধিবেশন)
সাঃ সম্পাদক - আচার্য উদয় চন্দ্র সিংহ, নালিবাড়ী (ইং ১৯৮৪ইং পেয়া)
- (১০) সভাপতি - শ্রী ভীমদেব শর্মা - তিনখাল (১৯৮৫-৯০ইংসাঃ সম্পাদক -
আচার্য উদয় চন্দ্র সিংহ-
সাংগঠনিক সম্পাদক শ্রী সেনাতায় সিংহ (১৯৮৮ইংরেজী ও ২০০৩ ইং পেয়া)
- (১১) সভাপতি - শ্রী রাধারমন বানার্জী (১৯৯০-৯৫ প্রতাপগড় (গোকিলাগ্রাম)
সাঃ সম্পাদক - আচার্য উদয় চন্দ্র সিংহ।
- (১২) সভাপতি - শ্রী রাধারমন বানার্জী (১৯৯৫-২০০৩ইং) গোকিলাগ্রাম।, সাঃ
সম্পাদক উদয়চন্দ্র সিংহ (১৯৯৫-২০০৩ইং)
- (১৩) সভাপতি - শ্রী শ্যামসুন্দর সিংহ - ২০০৪ইংরেজীও বর্তমান পেয়া।
সাঃ সম্পাদক - শ্রী কৃষ্ণচরণ সিংহ- ২০০৪ইংরেজী ও বর্তমান পেয়া
(রাজারগাঁও - প্রতাপগড়)

বিঃ দ্র :- তালিকাহান পরবর্তী পর্যায়ে আরাকৌ অন্তর্ভুক্ত অইতয়।

(৮) রাধামাধবজীউ সেবা পূজা সমিতির ২০০০ সনর থাংনার কামকাজ :- শ্রীশ্রী
রাধামাধব জীউ সেবাপূজা পরিচালনা সমিতির ২০০০ ইংরেজীর থাংনাকার উন্নতির
সিজিল কিসাদে আগ বাড়েছে, ঔহান থাংনাত চুম্বক আকারে চৌরাপ চৌরাপ খানি
আহান সাতকরানি অইল—

(ক) রাধামাধব প্রভুর সাংকা :- শ্রীশ্রী রাধামাধবজীউ সেবাপূজা পরিচালন
সমিতির সম্পাদক আচার্য উদয় চন্দ্র সিংহ গিরকর লগে সমিতির কর্ণধার
গিরিগিথানীর হংনায় ২০০০ ইংরেজীর রাধাকুণ্ডধামর শ্রীশ্রী রাধামাধব প্রভুর মন্দির
নাট মন্দির, ভাণ্ডারী কোঠা, কুঞ্জবাসী থানার ঘর ইত্যাদি হংকরানির কামে খানি
আহান কমিটির পক্ষও পদক্ষেপ নেনা অইল। ধামরমা ২০০৩ সালে শ্রীমন্দির সাংকা
কিতা আনুষ্ঠানিক ভাবে অনুষ্ঠিত অইল। পণ্ড বিষ্ণুপ্রিয়া মণিপুরী গিরিগিথানী ভারতর
হাবি ফামেও যোগদান করিয়া কামহান সুচারুরূপে পালন অইল। জাতর কৃষ্টিকলা

রক্ষারকা ডাকুলা ইসালপা, এলা-নাছা; কৃষ্ণলীলার মহাসংকর্তন কিতা অইল। একমাত্র সিংলাবাসী বাস রিজাভিশেনে প্রতিনিধিত্ব করেছিল ও মন্দির সাংকাত এসাদে করে থানি আহান পরিবর্তন অইল। ধন সম্পাল লয়া লয়াও দিয়া পেঠেয়া প্রভুর শ্রীমন্দির হংকরানির কাম কাজে থানি আহান আগ বাড়িল, যদিযৌ প্রভুর শ্রীমন্দিরর পূর্ণারূপরেখা এবুঝ পেয়া লম নাছে। শতকরা ২৫ভাগ কাম আছে বুলিয়া পৌ পানা অইল।

(খ) আচার্য উদয় চন্দ্র সিংহ গিরকর থাংনাকার পদক্ষেপ :- ২০০৪ সনে শিলচর সিঙ্গারীর ১২৪ তম অধিবেশনে রাধামাধব জীউ সেবা সমিতি নূয়া করে হঙইল। সম্পাদক আচার্য উদয় চন্দ্র সিংহ গিরকে কার্যভার সমঝানির ফলে নূয়া করে সাধারণ সম্পাদক শ্রী কৃষ্ণচরণ সিংহ, অবসরপ্রাপ্ত হেডমাষ্টার, রাজারগাঁও, পাথারকান্দি বারো সভাপতি শ্রী শ্যামসুন্দর সিংহ, গড়েরবন্দ, সিংলা লগে আরাকৌ গিরিগিথানী কতগো সদস্য হিসাবে লেপইলা। তা থকয়া এরে নূয়া করে লেপকরা সেবাপূজা সমিতির কার্যকালর মধ্যে আরাক থানি পরিবর্তন অইল। ওহান থাংনাত ফংকরানি অইল।

(গ) অডিট রিপোর্ট বা হিসাব নিকাশ শ্রীশ্রী রাধামাধব জীউ সেবা পূজা সমিতির আয় ব্যয়র অডিট বা হিসাব - নিকাশর তথ্য খমকরতেগা দিয়া পেঠানি অছেতায় ৬৫২০০.০০ (পয়ষট্টি হাজার দুইশ) বারো ৪৭০১২.০০ (সাতচল্লিশ হাজার বার) ব্যাংক একাউন্টে আছে। ওতা ছাড়া ব্যক্তিগত দান বারো অন্যান্য উৎসবাদি খরচর হিসাব লিপিবদ্ধ আছে। লিপিবদ্ধ তথ্যমতে হারপানি অইল যে সিংলা অঞ্চল বারো প্রতাপগড় অঞ্চলে সেবাপূজা খাতে নিয়ামরূপা জমা দেছি।

(ঘ) শ্রীশ্রী রাধামাধবজীউ সেবাপূজা সমিতির (সংশোধনী) সংবিধান :- ১৯৯৪ ইংরেজীরমা শ্রীশ্রী রাধামাধবজীউ সেবা পূজা গ্রহণ করানি অছিল। কিন্তু উহান সঠিক রূপায়ন করানির পথগো সার্থক করানিরকা ১২৪ তম শিলচর সিঙ্গারীর সাধারণ অধিবেশনে ২০০৪ ইংরেজীরমা সেবা-সমিতির বিধি বিধানবলী সংশোধনী করানির সিদ্ধান্ত নেনা আছে। ও সিদ্ধান্তমতে গেলগা ২০০৫ সনর ৩১ মার্চ তারিখে সেবাপূজা পরিচালন সমিতির সংশোধিত বিধি বিধানবলী সংবিধান কমিটির আহ্বায়ক শ্রীযুক্ত বীরেশ্বর সিংহ, সভাপতি শ্রী শ্যামসুন্দর সিংহ গিরক বারো সম্পাদক শ্রী কৃষ্ণচরণ সিংহ গিরক গাছির স্বাক্ষরে সংশোধিত বিধিবিধানাবলী আহান ফংকরানি অছে।

সংশোধিত বিধিবিধানাবলী ৪১নং ধারামতে নবদ্বীপের গোবিন্দবাড়ী আখড়াহানের ব্যাপারে লয়া লয়াও বছরে ২০০.০০ রুপা কেন্দ্রীয় সেবাপূজা পরিচালন সমিতির মা জমা দেনারকা উল্লেখ আছে। বারো রিপোর্টমতে হারপানি অইল যে ২০০৪ সনের ৪ জুলাই কার্যকরী সমিতির সভাত আগরতলার। A. S. অফিসার শ্রী বনমালী সিংহ গিরকর প্রস্তাবে সংশোধিত সংবিধান কমিটি হান হঙছে এহানাত সিংলার শ্রীযুক্ত সেনাতাম্ফা সিংহ সদস্য আগো আছে।

(ঙ) কেন্দ্রীয় সিদ্ধান্ত ২০০৫ইংরেজীর ২০, ২১ বারো ২২ মার্চ ১২৬ তম সেবাপূজা কেন্দ্রীয় সাধারণ অধিবেশন হাওর (ফুলতলী) ফামে বহেছিল। ঔ কেন্দ্রীয় সভার সিদ্ধান্ত মতে লেপ করানি আছে যে আঞ্চলিক সমিতির আয়-ব্যয়ের হিসাবর প্রতিবেদন আহের ১২৭ তম কেন্দ্রীয় সাধারণ অধিবেশনে হাবি লয়াও দাখিল করানির পরে ফঙইতয়া। দ্বিতীয়ত :- শ্রীমৎ পুঞ্জরীকাম্ফ শর্মা স্মৃতিচারণ সভার সিদ্ধান্তমতে শ্রীশ্রী রাধামাধবজীউ মন্দির প্রতিষ্ঠাতা সেবাইত শ্রী পুঞ্জরীকাম্ফ শর্মা এইগা গিরকরে “ব্রহ্মর্ষি” উপাধি দেনা অইল। বারো এইগা গিরকর তৈলচিত্র আগো জয়দেব ঠাকুর, নরোত্তম ঠাকুর বারো শ্রীভুবনেশ্বর সাধুঠাকুরর লগে সামঞ্জস্য থয়া ধামরমা হংকরানির দায়িত্ব ঔ সেবাইত গিরকরাং দায়িত্ব সমঝানি আছে। তৃতীয়তঃ- শ্রীশ্রী রাধামাধব প্রভুর নিঙে “রাধামাধব সমাচার” বুলিয়া পত্রিকা আহান ফংকরানিরকা প্রদ্বৈয় শ্রী সুভাষ চন্দ্র শর্মা, প্রতাপগড় খালপার গিরকরে সম্পাদকীয় বোর্ড আগোর মাধ্যমে দায়িত্ব দেনা আছে। বারো বিভিন্ন লয়াও প্রবন্ধ, রচনা, আদি পুলকরিয়া ছাপেয়া নিকালানির দায়িত্ব দেনা আছে। থাংনাত-কৈলাশহরর “শৌ-সেবা সমিতি” বুলিয়া সংগঠন আহানর বিভিন্ন উন্নয়নমুখী কার্যকলাপর প্রশংসা করানি আছে। এতার থাংনাত সেবাপূজা সমিতির প্রাক্তন সম্পাদক তথা বর্তমান মুখ্য উপদেষ্টা উদয় চন্দ্র সিংহ গিরকরে কাম-কাজর পরিপ্রেক্ষিতে “কর্মযোগী” উপাধি প্রদান করানি আছে। আরাক উল্লেখযোগ্য য়ারী আহান অইলতায় - ধামর যাত্রীনিবাসর পাকা করানির কাম কাজ পরি-কল্পিত ধন - সাম্পালর ৭৫ % (শতকরা ৭৫ ভাগ) জমা পড়ানির পিছেদে কামে আত দেনা অইতয় বুলিয়া সিদ্ধান্ত নেনা আছে। এতা হাবির থাংনাত ধামর সেবাইত গিরকে কুঞ্জবাসীর লগে তিন চারি মাহার ভিতরে অকেইখুরুম শ্রীমন্দিরর উন্নতির বিষয়ে আলোচনা করিয়া কেন্দ্রীয় সমিতিরে জানানির সিদ্ধান্ত নেনা আছে।


(৯) খামতলহান বা উপসংহার :- গজে ইকরা উপাদান বা খমকরিয়া পুলকরানির


তথ্যমতে খামতলে এহান মাতানি মনাউরিতায় যে শ্রী শ্রী রাধা মাধবজীউ সেবাপূজা পরিচালনা সমিতি এহান সমাজর রেজিষ্ট্রেশন করা স্বাধীন ধর্মীয় সংগঠন আহান। ১৯৯৪ ইংরেজীও লেপকরা স্বাধীন সংস্থা এহান পঞ্চ বিষ্ণুপ্রিয়া মণিপুরীর একমাত্র ধর্মীয় স্বাধীন সংস্থাহান শ্রীরাধাকুণ্ডধামে মূর্তি পালয়া আছে। ধামরমা ফিরালহান সাকয়া আছে ধর্মীয় ফাম এহান জাত তথা সমাজর মান ইজ্জত, কৃষ্টি-কলা বারো ঐতিহ্য রক্ষার প্রাণকেন্দ্রর ফামহান। ভারতর যেতা যেতা তীর্থর ফাম আছে, ঔতারমা এহান আমার জাতীয় গৌরবহান। আমার প্রাণ পুরুষ ব্রহ্মর্ষি পুঞ্জরীকাক্ষ শর্মা এইগা গিরকরাংতো চিনকরে আমার আপা-বপা গিরিগিথানীয়ে বর্ত্তিগো কুপেছি ফামহান। এহানরে আরাকৌ সমৃদ্ধশালী করানিরকা পর্যাপ্ত পরিমাণে তাংখা লিকলর দরকার। নুয়ারতারা লেইরাপা গিরি গিথানীয়ে ধান দ্বি আককাঠি বা রূপা দশহান দিয়া সেবা পূজার কাম চলেছে। কিন্তু সমাজরমা সম্বলপূর্ণ গিরিগিথানী য্যামপারা দেহিয়ার। ঔঔগিরিগি থানীরাং হেইচাহান, যথোপযুক্ত সাহায্যলো কমপক্ষে লিশিং আহানও অকরিয়া গজে যেগয় যেতা পারিল ধন সাম্পাল সাহায্যলো “দানম-পূণ্যকর্মম” নিঙহানলো কাতকরলে শ্রী মন্দির হংকরানি, তীর্থযাত্রী থানার ঘর, কুঞ্জবাসী থানার ঘর, বারো লগে আনুসঙ্গিক দরকারী সুযোগ-সুবিধা হংকরানির কাম-কাজে উন্নতির পথগো ইলয়তয়। সমিতির কর্মকর্তা গিরিগিথানীয়ে পাংকাল দেনা থক, যাতে শ্রীশ্রী রাধামাধব জীউ প্রভুর ধর্মীয় প্রতিষ্ঠান এহান ইঙাল ঙালয়া থানা, লগে নবদ্বীপ ধামরমা সাধুঠাকুরর লিংখাত করা গোবিন্দবাড়ী আশ্রমহানউ গুরুত্ব দেনা, বংকবেহারী জীউ মন্দিরগউ শ্রীবৃদ্ধিকরানি। কারণ ঐতিহাসিক লেখক গিরিগিথানীয়ে মাতিয়া গেছিগা যে নবদ্বীপধাম এহান উত্তর পূর্বভারতর তীর্থযাত্রীরকা থংচিলহান অর্থাৎ "Nabadwip is the gate way of North East Indian pilgrim"। যেতাউ অক, পরিশেষে এহানেই লক্ষ বস্ত্তহান যে প্রভুর শ্রীশ্রী রাধামাধবজীউ পঞ্চ মন্দিরর ধর্মীয় প্রতিষ্ঠান এহান রক্ষার কাম কাজে কিতিকুরুম অইলে জাতর অস্তিত্ব টিকিয়া থানা চিলছে। তা থকয়া এসাদে পঞ্চ বিঃ মণিপুরীর ধর্মীয় প্রতিষ্ঠানর উন্নতিরকা শ্রীশ্রী রাধারাণীর কৃপাদৃষ্টি হানরে গজে থয়া একমাত্র লক্ষ্য বস্ত্তর নিঙে হাবি ভক্ত মানাই বৈষ্ণব গিরিগিথানীয়ে পুন্নিংসেঙয়া শ্রীমন্দির পুনর্নির্মাণ বারো সেবাপূজার কাম কাজে পাংকাল দিয়া আগ বাড়ানি থক।

“জয় রাধে, জয় রাধে”।

— : তথ্য সংগ্রহ :—

- (১) সেবাইত মদনবাবু সিংহ গিরকর প্রদত্ত যারী করপেক বারো।
- (২) আচার্য উদয়চন্দ্র সিংহ গিরকর ইকরা রাধামাধব শ্রীমন্দিরর ইতিবৃত্ত।
- (৩) সিংলা আঞ্চলিক প্রাক্তন সভাপতি শ্রী সনাতান্ধা গিরকর খমকরা নথিপত্র।
- (৪) “প্রণব” পত্রিকা কলিকাতা, অগ্রাহায়ণ ১৪১৩ বাং ৮০তম বর্ষ অষ্টম সংখ্যা।





লেখকর পরিচিতি

শ্রীশ্রী রাধামাধব জীউ মন্দিরর উৎপত্তি বারো উন্নতির
সিঁজিলর লেখক শ্রী ব্রজগোপাল সিংহর জরমর ফামহান
করিমগঞ্জ জিলার কৃষ্ণনগর (খিলুয়া) গাঙে ১৯৫০
ইংরেজীর অক্টোবর মাহাত। জন্মদাতা পিতৃদেব “কুলচন্দ্র
সিংহ ঔবাকার ১৯০২ ইং ঐতিহ্যবাহী ১৩ নং দরগারবন্দ এল, পি, স্কুলর প্রধান
শিক্ষক বারো সহকারী প্রতিষ্ঠাতা। জন্মধাত্রী মাতৃদেবী “হেমলতা দেবী” (ছাবি)
গিথানকউ ১৯৩২ ইংরেজীর ১১৫ নং খুমল বালিকা বিদ্যালয়র (বর্তমান নিশিকান্ত
এল, পি) শিক্ষিকাগো হিসাবে সুনাম অর্জন করিয়া ১৯৯৩ ইং দ্যোর খয়া
পাছিলীগো শিক্ষার বেদে লেখক গিরক ১৯৭৬ ইংরেজীত। এম, এ বারো বিটি,
১৯৯৩ ইংরেজীত ব্যাকরণশাস্ত্রী বারো ১৯৯৬ ইংরেজীরমা এল, এল, বি ডিগ্রী
সুনাম সহকারে অর্জন করেছিল। কর্মজীবন অকরেছিলতায়ু, পয়লা ১৯৭৫
ইংরেজীরমা কতমাহা পাথারকান্দি মডেল হাইয়ার সেকেণ্ডারীত বিষয় শিক্ষক
(ইতিহাস) শিক্ষকতা, ১৯৭৭ ইংরেজীত ১৯৭৯ ইংরেজীর সেপ্টেম্বর পেয়া
নেহেরু বিদ্যাপীঠ হাইস্কুলর প্রধান শিক্ষক বারো ১৯৭৯ ইংরেজীত ১৯৯৮ ইং
ফেব্রুয়ারী পেয়া বিষয় শিক্ষক বারো উপাধ্যক্ষ পদে আসীন আছিল। এবাকা
বর্তমানে অধ্যক্ষ পদর দায়িত্বে কাম চালেয়া যারগা দুল্লভছড়া উচ্চতর মাধ্যমিক
বিদ্যালয়ে।

গিরকর ইকরা লেরিকরমা কবিতা সংকলন “লেইরুক” নাটক “নল
দময়ন্তী”, “দুল্লভছড়ার ইতিহাস” প্রবন্ধ, বারো “প্রবন্ধ সংকলন” কাব্য বারো
“শহীদ সুদেষ্ণা” উল্লেখযোগ্য। বর্তমানে লেখক নেহার বুলিয়া উত্তর-পূর্বাঞ্চল
ইতিহাস সংস্থার সদস্যগো। লেরিকরমা বিষুগপ্রিয়া মণিপুরী গোষ্ঠীর ইতিহাস
বারো আরোকৌ তেংকলহান প্রবন্ধ উল্লেখযোগ্য। বর্তমানে ১ম খণ্ড হিসাবে
রাধামাধব প্রভুর ইতিহাস ফংকরানি অইল।